

春秋經傳比事

春秋經傳比事卷十

閩 林春溥 鑑塘

成公

下

十有一年上春周公出奔晉

十二年春王使以周公之難來告書曰周公出奔晉凡自周無出周公自出故也

夏公會晉侯衛侯于瑣澤

公羊作沙澤

宋華元克合晉楚之成夏五月晉士燮會楚公子罷許偃癸亥盟于宋西門之外曰凡晉楚無相加戎好惡同之同恤舊危備救凶患若有害楚則晉伐之在晉楚亦如之交贄往來道路無壅謀其不協而討不庭有渝此盟明神殛之俾隊其師無克牂國鄭伯如晉聽成會于

瑱澤成故也

秋晉人敗狄于交剛

穀梁曰中國與夷狄不言戰皆曰敗之夷狄不曰

狄人聞宋之盟以侵晉而不設備秋晉人敗狄于交剛

冬十月

○晉卻至如楚聘且涖盟楚子享之子反相爲地室而縣焉卻至將登金奏作於下驚而走出子反曰日云莫矣寡君須矣吾子其入也賓曰君不忘先君之好施及下臣貺之以大禮重之以備樂如天之福兩君相見何以代此下臣不敢子反曰如天之福兩君相見無亦唯是一矢以相加遺焉用樂寡君須矣吾子其入也賓曰若讓之以一矢禍之大者其何福之爲世之治也諸侯聞於天子之事則相朝也於是乎有享宴之禮享以訓共

儉宴以示慈惠其儉以行禮而慈惠以布政政以禮成
民是以息百官承事朝而不夕此公侯之所以扞城其
民也故詩曰赳赳武夫公侯干城及其亂也諸侯貪冒
侵欲不思爭尋常以盡其民略其武夫以爲己腹心股
肱爪牙故詩曰赳赳武夫公侯腹心天下有道則公侯
能爲民干城而制其腹心亂則反之今吾子之言亂之
道也不可以爲法然吾子主也至敢不從遂入卒事歸
以語范文子文子曰無禮必食言吾死無日矣夫冬楚
公子罷如晉聘且涖盟十二月晉侯及楚公子罷盟于
赤棘

十有三年

癸未

春晉侯使卻錡來乞師

穀梁曰乞重辭也古之人重師故以乞言

也

十三年春晉侯使卻錡來乞師將事不敬孟獻子曰卻氏其亡乎禮身之幹也敬身之基也卻子無基且先君之嗣卿也受命以求師將社稷是衛而情棄君命也不亡何為

三月公如京師

三月公如京師宣伯欲賜請先使王以行人之禮禮焉國語曰魯成公來朝使叔孫僑如先聘曰告見王孫說與之語說言於王曰魯叔孫之來也其享覲之幣薄而言詔殆請之也若請之必欲賜也魯執政唯彊故不歡焉而後遣之且其狀本上而銳下宜觸管人王其勿賜若貪陵之人來而盈其願是不賞善也且財不給孟獻子曰諾使私問諸魯請之也王遂不賜禮如行人孟獻子從王以為介而重賄之

夏五月公自京師遂會晉侯齊侯穀梁無宋公衛侯鄭伯

曹伯邾人滕人伐秦曹伯廬卒于師

公及諸侯朝王遂從劉康公成肅公會晉侯伐秦成子
受賜于社不敬劉子曰吾聞之民受天地之中以生所
謂命也是以有動作禮義威儀之則以定命也能者養
之以福不能者收以取禍是故君子勤禮小人盡力勤
禮莫如致敬盡力莫如敦篤敬在養神篤在守業國之
人事在祀與戎祀有執牖戎有受賑神之節也今成
子弗棄其命矣其不反乎夏四月戊午晉侯使呂相絕
秦曰昔逮我獻公及穆公相好戮力同心申之以盟誓
重之以昏姻天禍晉國文公如齊惠公如秦無祿獻公
卽世穆公不忘舊德俾我惠公用能奉祀于晉又不能
成大勲而爲韓之師亦悔于厥心用集我文公是穆之
成也文公躬環甲冑跋履山川踰越險阻征東之諸侯

虞夏商周之脩而朝諸秦則亦既報舊德矣鄭人怒君之驅場我文公帥諸侯及秦圍鄭秦大夫不詢于我寡君擅及鄭盟諸侯疾之將致命于秦文公恐懼綏靜諸侯奈帥克還無害則是我有大造于西也無祿文公卽世穆爲不弔蔑死我君寡我襄公迭我殽地奸絕我好伐我保城殄滅我費滑散離我兄弟撓亂我同盟傾覆我國家我襄公未忘君之舊勲而懼社稷之隕是以有殽之師猶願赦罪于穆公穆公弗聽而卽楚謀我天誘其衷成王隕命穆公是以不克逞志于我穆襄卽世康靈卽位康公我之自出又欲闕翦我公室傾覆我社稷帥我螫賊以來蕩搖我邊疆我是以有令狐之役康猶不悛入我河曲伐我涑川俘我王官翦我羈馬我是以

有河曲之戰東道之不通則是康公絕我好也及君之
嗣也我君景公引領西望曰庶撫我乎君亦不惠稱盟
利吾有狄難入我河縣焚我箕郛芟夷我農功虔劉我
邊垂我是以有輔氏之聚君亦悔禍之延而欲徼福于
先君獻穆使伯車來命我景公曰吾與女同好棄惡復
脩舊德以追念前勲言誓未就景公卽世我寡君是以
有令狐之會君又不祥背棄盟誓白狄及君同州君之
仇讎而我之昏姻也君來賜命曰吾與女伐狄寡君不
敢顧昏姻畏君之威而受命于吏君有二心于狄曰晉
將伐女狄應且憎是用告我楚人惡君之二三其德也
亦來告我曰秦背令狐之盟而來求盟于我昭告昊天
上帝秦三公楚三王曰余雖與晉出入余唯利是視不

穀惡其無成德是用宣之以懲不壹諸侯備聞此言斯
是用痛心疾首暱就寡人寡人帥以聽命唯好是求君
若惠顧諸侯矜哀寡人而賜之盟則寡人之願也其承
寧諸侯以退豈敢徼亂君若不施大惠寡人不佞其不
能以諸侯退矣敢盡布之執事俾執事實圖利之秦桓
公既與晉厲公爲令狐之盟而又召狄與楚欲道以伐
晉諸侯是以睦於晉晉欒書將中軍荀庚佐之士燮將
上軍卻錡佐之韓厥將下軍荀營佐之趙旃將新軍卻
至佐之卻縠御戎欒鍼爲右孟獻子曰晉帥乘和師必
有大功五月丁亥晉帥以諸侯之師及秦師戰于麻隧
秦師敗績獲秦成差及不更女父曹宣公卒于師師遂
濟涇及侯麗而還邲晉侯于新楚成肅公卒于瑕

六月丁卯夜鄭公子班自訾求入于大宮不能殺子印
子羽反軍于市己巳子駟帥國人盟于大宮遂從而盡
焚之殺子如子駟孫叔孫知○曹人使公子負芻守使
公子欣時逆曹伯之喪秋負芻殺其太子而自立也諸
侯乃請討之晉人以其役之勞請俟他年

秋七月公至自伐秦

冬葬曹宣公

冬葬曹宣公既葬子臧時欣將亡國人皆將從之成公乃
懼告罪且請焉乃反而致其邑

十有四年

甲申○曹成公負芻元年

春王正月莒子朱卒

夏衛孫林父自晉歸于衛

十四年春衛侯如晉晉侯強見孫林父焉定公不可夏

衛侯既歸晉侯使卻棼送孫林父而見之衛侯欲辭定姜曰不可是先君宗卿之嗣也大國又以爲請不許將亡雖惡之不猶愈於亡乎君其忍之安民而有宗卿不亦可乎衛侯見而復之衛侯饗苦成叔棼甯惠子相苦成叔傲甯子曰苦成家其亡乎古之爲享食也以觀威儀省禍福也故詩曰兕觥其觶旨酒思柔彼交匪傲萬福來求今夫子傲取禍之道也

秋叔孫僑如如齊逆女

秋宣伯如齊逆女稱族尊君命也

鄭公子喜帥師伐許

八月鄭子罕伐許敗焉戊戌鄭伯復伐許庚子入其郛許人平以叔申之封

九月僑如以夫人婦姜氏至自齊

穀梁曰大夫不以夫人以夫人非正也刺不親

也迎

九月僑如以夫人婦姜氏至自齊舍族尊夫人也故君子曰春秋之稱微而顯志而晦婉而成章盡而不汙懲惡而勸善非聖人誰能脩之

冬十月庚寅衛侯臧卒

衛侯有疾使孔成子甯惠子立敬嬖之子伋以爲大子冬十月衛定公卒夫人姜氏既哭而息見大子之哀也不內酌飲歎曰是夫也將不唯衛國之敗其必始於未亡人烏呼天禍衛國也夫吾不獲鱗也使主社稷大夫聞之無不聳懼孫文子自是不敢舍其重器於衛盡寘諸賊而甚善晉大夫

秦伯卒

十有五年

乙酉○衛獻公弑元
年○秦景公元年

春王二月葬衛定公

三月乙巳仲嬰齊卒

公羊曰公孫嬰齊則曷為謂之仲嬰齊為兄後也為兄後則其稱仲何孫

以王父字為氏也然則
嬰齊孰後後歸父也

癸丑公會晉侯衛侯鄭伯曹伯宋世子成

公羊作成

齊國佐邾

人同盟于戚晉侯執曹伯歸

公羊有之字

于京師

十五年春會于戚討曹成公也執而歸諸京師書曰晉

侯執曹伯不及其民也凡君不道於其民諸侯討而執

之則曰某人執某侯不然則否諸侯將見子臧於王而

立之子臧辭曰前志有之曰聖達節次守節下失節為

君非吾節也雖不能聖敢失守乎遂逃奔宋

公至自會

六月宋公固卒

夏六月宋其公卒

楚子伐鄭

楚將北師子囊曰新與晉盟而背之無乃不可乎子反曰敵利則進何盟之有申叔時老矣在申聞之曰子反必不免信以守禮禮以庇身信禮之亡欲免得乎楚子侵鄭及暴隧遂侵衛及首止鄭子罕侵楚取新石欒武子欲報楚韓獻子曰無庸使重其罪民將叛之無民孰

戰

秋八月庚辰葬宋其公宋華元出奔晉宋華元自晉歸于宋宋殺其大夫山宋魚石出奔楚

秋八月葬宋其公於是華元爲右師魚石爲左師蕩澤

爲司馬華喜爲司徒公孫師爲司城向爲人爲大司寇
鱗朱爲少司寇向帶爲大宰魚府爲少宰蕩澤弼公室
殺公子肥華元曰我爲右師君臣之訓師所司也今公
室卑而不能正吾罪大矣不能治官敢賴寵乎乃出奔
晉二華戴族也司城莊族也六官者皆桓族也魚石將
止華元魚府曰右師反必討是無桓氏也魚石曰右師
苟獲反雖許之討必不敢且多大功國人與之不反懼
桓氏之無祀於宋也右師討猶有戍在桓氏雖亡必偏
魚石自止華元于河上請討許之乃反使華喜公孫師
帥國人攻蕩氏殺子山書曰宋殺其大夫山言背其族
也魚石向爲人鱗朱向帶魚府出舍於睢上華元使止
之不可冬十月華元自止之不可乃反魚府曰今不從

不得入矣右師視速而言疾有異志焉若不我納今將
馳矣登丘而望之則馳騁而從之則決雖滋閉門登陴
矣左師二司寇二宰遂出奔楚華元使向戌爲左司老
佐爲司馬樂裔爲司寇以靖國人

○晉三卻害伯宗譖而殺之及欒弗忘伯州犂

伯宗子

奔楚

韓獻子曰卻氏其不免乎善人天地之紀也而驟絕之
不亡何待初伯宗每朝其妻必戒之曰盜憎主人民惡

其上子好直言必及於難

國語曰伯宗朝以喜歸其妻曰子貌有喜何也曰吾言於

朝諸大夫皆謂我知似陽子對曰陽子華而不實主言
而無謀是以難及其身子何喜焉伯宗曰吾欲諸大夫
濟而與之語爾試聽之曰諾既飲其妻曰諸大夫莫子
若也然而民不能戴其上久矣難必及于子盍亟索士
慙庇州犂焉得畢陽及欒弗忘之難諸大夫
害伯宗將謀而殺之畢陽實送州犂於荆

冬十有一月叔孫僑如會晉士燮齊高無咎宋華元衛孫

林父鄭公子鱣邾人會吳于鍾離

公羊曰曷為殊會吳外吳也春秋內其國而外

諸夏內諸夏而外夷狄

十一月會吳于鍾離始通吳也

許遷于葉

許靈公畏偪于鄭請遷于楚辛丑楚公子申遷許于葉

十有六年

丙戌

春王正月雨木冰

穀梁曰雨而木冰也志異也傳曰根枝折

○十六年春楚子自武城使公子成以汝陰之田求成于

鄭鄭叛晉子駟從楚子盟于武城

夏四月辛未滕子卒

夏四月滕文公卒

鄭公子

穀梁作公孫

喜帥師侵宋

鄭子罕伐宋宋將鉏樂懼敗諸洧舍於夫渠不做

鄭人覆之敗諸洧陵獲將鉏樂懼宋恃勝也

○衛侯伐鄭至于鳴雁爲晉故也

六月丙寅朔日有食之

晉侯使欒黶來乞師甲午晦晉侯及楚子鄭伯戰于鄢陵

楚子鄭師收績

穀梁曰日事遇晦日晦四體偏斷日敗此其敗則日也楚不言師君重于師也

晉侯將伐鄭范文子曰若逞吾願諸侯皆叛晉可以逞

若唯鄭叛晉國之憂可立俟也欒武子曰不可以當吾

世而失諸侯必伐鄭乃興師欒書將中軍士燮佐之卻

錡將上軍荀偃佐之韓厥將下軍卻至佐新軍荀偈居

守卻嬖如衛遂如齊皆乞師焉欒黶來乞師孟獻子曰

有勝矣戊寅晉師起鄭人聞有晉師使告于楚姚句耳

與往楚子救鄭司馬反將中軍令尹子將左右尹子辛

將右過申子反入見申叔時曰師其何如對曰德刑詳義禮信戰之器也德以施惠刑以正邪詳以事神義以建利禮以順時信以守物民生厚而德正用利而事節時順而物成上下和睦周旋不逆求無不具各知其極故詩曰立我烝民莫匪爾極是以神降之福時無災害民生敦厯和同以聽莫不盡力以從上命致死以補其闕此戰之所由克也今楚內棄其民而外絕其好瀆齊盟而食話言奸時以動而疲民以逞民不知信進退罪也人恤所底其誰致死子其勉之吾不復見子矣姚句耳先歸子駟問焉對曰其行速過險而不整速則失志不整喪列志失列喪將何以戰楚懼不可用也五月晉師濟河聞楚師將至范文子欲反曰我僞逃楚可以紓

憂夫合諸侯非吾所能也以遭能者我若羣臣輯睦以
事君多矣武子曰不可六月晉楚遇於鄢陵范文子不
欲戰卻至曰韓之戰惠公不振旅箕之役先軫不反命
邲之師荀伯不復從皆晉之恥也子亦見先君之事矣
今我辟楚又益恥也文子曰吾先君之亟戰也有故秦
狄齊楚皆彊不盡力子孫將弱今三彊服矣敵楚而已
唯聖人能外內無患自非聖人外寧必有內憂盍釋楚
以爲外懼乎甲午晦楚晨壓晉軍而陳軍吏患之范匄
趨進曰塞井夷竈陳於軍中而疏行首晉楚唯天所授
何患焉文子執戈逐之曰國之存亡天也童子何知焉
欒書曰楚師輕窵固壘而待之三日必退退而擊之必
獲勝焉

國語曰楚半陳公令擊之欒書曰君使黶也與齊魯之師請侯之卻至曰不可楚師將退我擊

之必以勝歸

郤至曰楚有六閒不可失也其二卿相惡王卒

以舊鄭陳而不整蠻軍而不陳陳不違晦在陳而蹢合而加蹢各顧其後莫有鬪心舊不必良以犯天忌我必克之楚子登巢車以望晉軍子重使大宰伯州犂侍于王後王曰騁而左右何也曰召軍吏也皆聚於中軍矣曰合謀也張幕矣曰虔卜於先君也徹幕矣曰將發命也甚蹢且塵上矣曰將塞井夷竈而爲行也皆乘矣左右執兵而下矣曰聽誓也戰乎曰未可知也乘而左右皆下矣曰戰禱也伯州犂以公卒告王苗賁皇在晉侯之側亦以王卒告皆曰國士在且厚不可當也苗賁皇言於晉侯曰楚之良在其中軍王族而已請分良以擊其左右而三軍萃於王卒必大敗之公筮之史曰吉其

卦遇復三三曰南國蹙射其元王中厥目國蹙王傷不
敗何待公從之有淖於前乃皆左右相違於淖步毅御
晉厲公欒鍼爲右彭名御楚其王潘黨爲右石首御鄭
成公唐荀爲右欒范以其族夾公行陷於淖欒書將載
箚侯鍼曰書退國有大任焉得專之且侵官冒也失官
慢也離局茲也有三罪焉不可犯也乃掀公以出於淖
癸巳潘尪之黨與養由基蹲甲而射之徹七札焉以示
王曰君有二臣如此何憂於戰王怒曰大辱國詰朝爾
射死欒呂錡夢射月中之退入於泥占之曰姬姓日也
異姓月也必楚王也射而中之退入於泥亦必死矣及
戰射其王中目王召養由基與之兩矢使射呂錡中項
伏弢以一矢復命卻至三遇楚子之卒見楚子必下免

胄而趨風楚子使工尹襄問之以弓曰方事之殷也有
秣韋之跗注君子也識見不穀而趨無乃傷乎卻至見
客免胄承命曰君之外臣至從寡君之戎事以君之靈
開蒙甲冑不敢拜命敢告不寧君命之辱爲事之故敢
肅使者三肅使者而退晉韓厥從鄭伯其御杜溷羅曰
速從之其御履顧不在馬可及也韓厥曰不可以再辱
國君乃止卻至從鄭伯其右蒍翰胡曰謀輅之余從之
乘而俘以下卻至曰傷國君有刑亦止石首曰衛懿公
唯不去其旗是以敗於熒乃內旌於燬中唐苟謂石首
曰子在君側敗者壹大我不如子子以君免我請止乃
死楚師蒞於險叔山冉謂養由基曰雖君有命爲國故
子必射乃射再發盡殪叔山冉排人以投中車折軾晉

師乃止囚楚公子校樂鍼見子重之旌請曰楚人謂夫旌子重之麾也彼其子重也曰臣之使於楚也子重問晉國之勇臣對曰好以衆整曰又何如臣對曰好以暇今兩國治戎行人不使不可謂整臨事而食言不可謂暇請攝飲焉公許之使行人執榼承飲造于子重曰寡君乏使使鍼御持矛是以不得犒從者使某攝飲子重曰夫子嘗與吾言於楚必是故也不亦識乎受而飲之免使者而復鼓旦而戰見星未巳子反命軍吏察夷傷補卒乘繕甲兵展車馬雞鳴而食唯命是聽晉人患之苗賁皇徇曰蒐乘補卒秣馬利兵脩陳固列蓐食申禱明日復戰乃逸楚囚王聞之召子反謀穀陽豎獻飲於子反子反醉而不能見王曰天敗楚也夫余不可以待

乃宵遁晉入楚軍三日穀范文子立於戎馬之前曰君幼諸臣不佞何以及此君其戒之周書曰惟命不于常有德之謂

楚殺其大夫公子側

楚師還及瑕王使謂子反曰先大夫之覆師徒者君不在子無以爲過不穀之罪也子反再拜稽首曰君賜臣死死且不朽臣之卒實奔臣之罪也子重使謂子反曰初隕師徒者而亦聞之矣盍圖之對曰雖微先大夫有之大夫命側側敢不義側亡君師敢忘其死王使止之弗及而卒

秋公會晉侯齊侯衛侯宋華元邾人于沙隨不見公

穀梁曰不

見公者可以見公也可以見公而不見公議在諸侯也

戰之日齊國佐高無咎至于師衛侯出于衛公出于壤
駟宣伯過於穆姜欲去季孟而取其室將行穆姜送公
而僕還二子公以晉難告曰請反而聽命姜怒公子偃
公子鉏趨過指之曰女不可是皆君也公待於壤隤申
宮敝備設守而後行是以後使孟獻子守于公宮秋會
于沙隨謀伐鄭也宣伯使告卻曄曰魯侯待于壤隤以
待勝者卻曄將新軍且爲公族大夫以主東諸侯取貨
于宣伯而訴公于晉侯晉侯不見公

公至自會

○曹人請于晉曰自我先君宣公卽世國人曰若之何憂
猶未弭而又討我寡君以亡曹國社稷之鎮公子是大
泯曹也先君無乃有罪乎若有罪則君列諸會矣君唯

不遺德刑以伯諸侯豈獨遺諸敝邑敢私布之

公會尹子晉侯齊國佐邾人伐鄭

七月公會尹武公及諸侯伐鄭將行姜又命公如初公又申守而行諸侯之師次于鄭西我師次于督揚不敢過鄭子叔聲伯使叔孫豹請逆于晉師爲食於鄭郊師逆以至聲伯四日不食以待之食使者而後食諸侯遷于制田知武子佐下軍以公之師侵陳至于鳴鹿遂侵蔡未反諸侯遷于潁以午鄭子罕宵軍之宋齊衛皆失軍

曹伯歸自京師

公羊曰執而歸者名曹伯何以不名而不復歸于曹何易也公子喜時在內也公

子喜時者仁人也內平其國而待之外治諸京師而免之其言自京師何其易也穀梁曰不言所歸歸之善者也出人不名以爲不失其國也歸爲善自某歸次之

曹人復請于晉晉侯謂子臧反吾歸而君子臧反曹伯歸子臧盡致其邑與卿而不出

九月晉人執季孫行父舍之于莒

公羊作招

宣伯使告卻犇曰魯之有季孟猶晉之有欒范也政令於是乎成今其謀曰晉政多門不可從也寧事齊楚有亡而已蔑從晉矣若欲得志於魯請止行父而殺之我斃蔑也而事晉蔑有貳矣魯不貳小國必睦不然歸必叛矣九月晉人執季文子于莒

公羊曰執未有言舍之者此其言舍之何

仁之也仁之何代公執也前此者晉人來乞師而不與公會晉侯將執公季孫行父曰此臣之罪也於是執季孫行父公還待于鄆使子叔聲伯請季孫于晉卻犇曰苟

去仲孫蔑而止季孫行父吾與子國親於公室對曰僞如之情子必聞之矣若去蔑與行父是大棄魯國而罪

寡君也若猶不棄而惠徼周公之福使寡君得事晉君
則夫二人者魯國社稷之臣也若朝亡之魯必夕亡以
魯之密邇仇讎亡而爲讎治之何及卻犇曰吾爲子請
邑對曰嬰齊魯之常隸也敢介大國以求厚焉承寡君
之命以請若得所請吾子之賜多矣又何求

國語曰子叔聲伯如

晉謝季文子卻犇欲與之邑弗受也歸鮑國謂之曰子何辭苦成叔之邑對曰吾聞之不厚其棟不能任重重莫如國棟莫如德夫苦成叔家欲任兩國而無大德亡無日矣少德而多寵位下而欲上政無大功而欲大祿皆怨府也其身之不能定焉能予人邑范文子謂欒武子曰季孫於魯相

二君矣妾不衣帛馬不食粟可不謂忠乎信讒慝而棄忠良若諸侯何子叔嬰齊奉君命無私謀國家不貳圖其身不忘其君若虛其請是棄善人也子其圖之乃許
魯平赦季孫

十月乙亥叔孫僑如出奔齊

冬十月出叔孫僑如而盟之僑如奔齊

有二月乙丑季孫行父及晉卻鞫盟于扈公至自會乙

刺公子假

穀梁曰大夫日卒正也先刺後名殺無罪也

十二月季孫及卻鞫盟于扈歸刺公子假召叔孫豹于

齊而立之

○齊聲孟子通僑如使立於國高之聞僑如曰不可以再

罪奔衛亦聞於卿○晉侯使卻至獻楚捷于周與單襄

公語驟稱其伐單子語諸大夫曰溫季其亡乎位於七

人之下而求掩其上怨之所聚亂之本也多怨而階亂

何以在位夏書曰怨豈在明不見是圖將慎其細也今

而明之其可乎

十有七年丁亥春衛北宮括帥師侵鄭

十七年春王正月鄭子駟侵晉盧滑衛北宮括救晉侵鄭至于高氏

夏公會尹子單子晉侯齊侯宋公衛侯曹伯邾人伐鄭

夏五月鄭大子髡頑侯儒爲質於楚楚公子成公子寅戊鄭公會尹武公單襄公及諸侯伐鄭自戲童至于曲洧

○晉范文子反自鄆陵使其祝宗祈死曰君驕侈而克敵是天益其疾也難將作矣愛我者唯祝我使我速死無及於難范氏之福也六月戊辰士燮卒

六月乙酉同盟于柯陵

穀梁曰謀復伐鄭也

乙酉同盟于柯陵尋戚之盟也

國語曰柯陵之會單襄公見晉厲公視遠步高

晉郤錡見其子弟其語犯郤犇見其語迂郤至見其語伐
齊國佐見其語盡善成公見言及晉難及郤犇之語單
子曰君何患焉晉將有亂其君與三郤其當之乎魯侯
曰寡人懼不免於晉今君曰將有亂敢問天道乎抑人
故也對曰吾非瞽史焉知天道吾見晉君之容而聽三
郤之語矣殆必禍者也夫君子以定體足以從之是
以觀其容而知其心矣目以處義足以步目今晉侯視
遠而足高日不在郤而足不步日其心必異矣目體不
相從何以能久夫郤氏晉之寵人也三卿而五大夫可
以戒懼矣高位實疾債厚味實禍今郤伯之語犯叔
迂季伐犯則陵人迂則誣人伐則拚人有是寵也而益
之以三惡其誰能忍之雖齊國子亦將與焉立於淫亂
之國而好盡言以招人過怨之本也唯善人能受盡言
齊其有乎吾聞之國德而鄰於不脩必受其禍今君偏
於晉而鄰於齊晉有禍可以取伯無德之患何憂於
晉且夫長翟之人利而不義其利淫矣流之苦何魯侯
歸乃逐叔孫僑如

秋公至自會

穀梁曰不曰至自伐鄭何公不周乎伐鄭也
何以知公之不周乎伐鄭以其以會致也

楚子重救鄭師于首止諸侯還

齊高無咎出奔莒

齊慶克通于聲孟子與婦人蒙衣乘輦而入于閔鮑牽見之以告國武子武子召慶克而謂之慶克久不出而告夫人曰國子謫我夫人怒國子相靈公以會高鮑處守及還將至閉門而索客孟子訴之曰高鮑將不納君而立公子角國子知之秋七月壬寅則鮑牽而逐高無咎無咎奔莒高弱子無咎以盧叛齊人來召鮑國而立之初鮑國去鮑氏而來爲施孝叔臣施氏卜宰匡句須吉施氏之宰有百室之邑與匡句須邑使爲宰以讓鮑國而致邑焉施孝叔曰子實吉對曰能與忠良吉孰大焉鮑國相施氏患故齊人取以爲鮑氏後仲尼曰鮑莊子之知不如葵葵猶能徯其足

九月辛丑用郊

公羊曰用者不宜用也九月非所用郊也然則郊曷用郊用正月壬辛

晉侯使荀息來乞師

冬公會單子晉侯宋公衛侯曹伯齊人邾人伐鄭

穀梁曰言公不

背柯陵之盟也

冬諸侯伐鄭十月庚午圍鄭

十一月公至自伐鄭

楚公子申救鄭師于汝上十一月諸侯還

壬申公孫嬰齊卒于鯉

鯉公羊作軫穀梁作鯉○穀梁曰十一月無壬申壬申乃十月

也致公而後錄臣子之

初聲伯夢涉洹或與己瓊瑰食之泣而爲瓊瑰盈其懷

從而歌之曰濟洹之水贈我以瓊瑰歸乎歸乎瓊瑰盈

吾懷乎懼不敢占也還自鄭壬申至于鯉而占之曰

余恐死故不敢占也今衆繁而從余三年矣無傷也言

之之莫而卒

○齊侯使崔杼爲大夫使慶克佐之帥師圍盧國佐從諸侯圍鄭以難請而歸遂如盧師殺慶克以穀叛齊侯與之盟于徐闕而復之十二月盧降使國勝子佐告難于晉待命于清

十有二月丁巳朔日有食之

邾子貜且卒

晉殺其大夫卻錡卻犇卻至

穀梁曰自禍於是起矣

晉厲公侈多外嬖反自鄆陵欲盡去羣大夫而立其左右胥童以胥克之廢也怨卻氏而嬖於厲公卻錡奪夷陽五田五亦嬖於厲公卻犇與長魚矯爭田執而梏之與其父母妻子同一轅旣矯亦嬖於厲公欒書怨卻至

以其不從己而敗楚師也欲廢之使楚公子校告公曰
此戰也卻至實召寡君以東師之未至也與軍帥之不
具也曰此必敗吾因奉孫周以事君公告欒書書曰其
有焉不然豈其死之不恤而受敵使乎君盍嘗使諸周
而察之卻至聘于周欒書使孫周見之公使覘之信遂
怨卻至厲公田與婦人先殺而飲酒後使大夫殺卻至
奉豕寺人孟張奪之卻至射而殺之公曰季子欺余厲
公將作難胥童曰必先三卻族大多怨去大族不偏敵
多怨有庸公曰然卻氏聞之卻錡欲攻公曰雖死君必
危卻至曰人所以立信知勇也信不叛君知不害民勇
不作亂失茲三者其誰與我死而多怨將安用之君實
有臣而殺之其謂君何我之有罪吾死後矣若殺不辜

將失其民欲安得乎待命而已受君之祿是以聚黨有
黨而爭命罪孰大焉壬午胥童夷羊五帥甲八百將攻
郤氏長魚矯請無用眾公使清沸魋助之抽戈結衽而
僞訟者三郤將謀於榭矯以戈殺駒伯郤苦成叔於其
位溫季曰逃威也遂趨矯及諸其車以戈殺之皆尸諸
朝胥童以甲劫欒書中行偃於朝矯曰不殺二子憂必
及君公曰一朝而尸三卿余不忍益也對曰人將忍君
臣聞亂在外爲姦在內爲軌御姦以德御軌以刑不施
而殺不可謂德臣偪而不討不可謂刑德刑不立姦軌
並至臣請行遂出奔狄公使辭於二子曰寡人有討於
郤氏郤氏旣伏其事矣大夫無辱其復職位皆再拜稽
首曰君討有罪而免臣於死君之惠也二臣雖死敢忘

君德乃皆歸公使胥童爲卿公遊于匠麗氏樂書中行
假遂執公焉召士勾士勾辭召韓厥韓厥辭曰昔吾畜
於趙氏孟姬之讒吾能違兵古人有言曰殺老牛莫之
敢尸而況君乎二三子不能事君焉用厥也國語曰中
之樂書曰不可其身果而辭順犯順不
祥伐果不克吾雖欲攻之其能乎乃止

楚人滅舒庸

舒庸人以楚師之敗也道吳人圍巢伐駕圍麇虺遂恃
吳而不設備楚公子橐師襲舒庸滅之

○閏月乙卯晦樂書中行偃殺胥童民不與郤氏胥童道
君爲亂故皆書曰晉殺其大夫

十有八年

戊子

春王正月晉殺其大夫胥童

庚申晉弑其君州蒲

穀梁曰稱國以弑其君君惡甚矣

十八年春王正月庚申晉欒書中行偃使程滑弑厲公
葬之于翼東門之外以車一乘使荀偃士魴逆周子于

京師而立之生十四年矣國語曰晉孫談之子周適周事單襄公立無跛視無還聽

無咎言無遠晉國有憂未嘗不戚有慶未嘗不怡襄公
有疾召頃公而告之曰必善晉周將得晉國晉仍無道
而衛門其將失之矣子其當之也頃公許諾大夫逆于清原周子曰孤始願

不及此雖及此豈非天乎抑人之求君使出命也立而

不從將安用君二三子用我今日否亦今日共而從君

神之所福也對曰羣臣之願也敢不唯命是聽庚午盟

而入館于伯子同氏辛巳朝于武宮逐不臣者七人周

子有兄而無慧不能辨菽麥故不可立

齊殺其大夫國佐

齊爲慶氏之難故甲申晦齊侯使士華免以戈殺國佐

于內宮之朝師逃于夫人之宮書曰齊殺其大夫國佐
棄命專殺以穀叛故也使清人殺國勝國弱來奔王湫
奔萊慶封爲大夫慶佐爲司寇旣齊侯反國弱使嗣國
氏禮也

○二月乙酉朔晉悼公卽位于朝始命百官施舍已責逮
鰥寡振廢滯匡乏困救災患禁淫慝薄賦斂宥罪戾節
器用時用民欲無犯時使魏相士魴魏頡趙武爲卿荀
家荀會欒黶韓無忌爲公族大夫使訓卿之子弟其儉
孝弟使士渥濁爲大傅使脩范武子之法右行辛爲司
空使脩士蒍之法弁糾御戎校正屬焉使訓諸御知義
荀賓爲右司士屬焉使訓勇力之士時使卿無其御立
軍尉以攝之祁奚爲中軍尉羊舌職佐之魏絳爲司馬

張老爲候奄鐸遏寇爲上軍尉籍偃爲之司馬使訓卒
乘親以聽命程鄭爲乘馬御六駟屬焉使訓羣駟知禮
凡六官之長皆民譽也舉不失職官不易方爵不踰德
師不陵正旅不偪師民無謗言所以復霸也

公如晉

公如晉朝嗣君也

夏楚子鄭伯伐宋宋魚石復入于彭城

夏六月鄭伯侵宋及曹門外遂會楚子伐宋取朝郟楚
子辛鄭皇辰侵城郕取幽丘同伐彭城納宋魚石向爲
人鱗朱向帶魚府焉以三百乘戍之而還書曰復入凡
去其國國逆而立之曰入復其位曰復歸諸侯納之曰
歸以惡曰復入宋人患之西鉏吾曰何也若楚人與吾

同惡以德於我吾固事之也不敢貳矣大國無厭鄙我
猶憾不然而收吾憎使贊其政以閒吾釁亦吾患也今
將崇諸侯之姦而披其地以塞夷庚逞姦而攜服毒諸
侯而懼吳晉吾庸多矣非吾憂也且事晉何爲晉必恤
之

公至自晉晉侯使士匄來聘

公至自晉晉范宣子來聘且拜朝也君子謂晉於是乎
有禮

秋杞伯來朝

秋杞桓公來朝勞公且問晉故公以晉君語之杞伯於
是驟朝于晉而請爲昏

○七月宋老佐華喜圍彭城老佐卒焉

八月邾子來朝

八月邾宣公來朝卽位而來見也

築鹿囿

穀梁曰築不志此其志何也山林藪澤之利所以與民共也虞之非正也

築鹿囿書不時也

己丑公薨于路寢

己丑公薨于路寢言道也

冬楚人鄭人侵宋

冬十一月楚子重救彭城伐宋宋華元如晉告急韓獻子爲政曰欲求得人必先勤之成霸安彊自宋始矣晉侯師于台谷以救宋遇楚師於靡角之谷楚師還

晉侯使士魴

公羊作士彭

來乞師

士魴來乞師季文子問師數於臧武仲對曰伐鄭之

役知伯實來下軍之佐也今彘季士亦佐下軍如伐鄭可也事大國無失班爵而加敬焉禮也從之

十有二月仲孫蔑會晉侯宋公衛侯邾子齊崔杼同盟于虛杓

十二月孟獻子會于虛杓謀救宋也宋人辭諸侯而請師以圍彭城孟獻子請于諸侯而先歸會葬

丁未葬我君成公

丁未葬我君成公書順也

附錄

竹書楚共王會宋平公于湖陽

春秋經傳比事卷十終

春秋比事卷十

成公下

三

春秋經傳比事卷十一

閩 林春溥 鑑塘

襄公

○名午成公子母定姒諡法
四事有功曰襄辟土有德曰襄

元年

己丑○晉悼
公周元年

春王正月公卽位

穀梁曰繼正
卽位正也

仲孫蔑會晉欒黶宋華元衛甯殖曹人莒人邾人滕人薛

人圍宋彭城

穀梁曰繫彭城於宋
者不與魚石正也

元年春己亥圍宋彭城非宋地追書也於是爲宋討魚

石故稱宋且不登叛人也謂之宋志彭城降晉晉人以

宋五大夫在彭城者歸賓諸瓠丘齊人不會彭城晉人

以爲討二月齊大子光爲質於晉

夏晉韓厥

公羊作
韓厥

帥師伐鄭仲孫蔑會齊崔杼曹人邾人

杞人次于鄆

鄆公羊
作合

夏五月晉韓厥荀偃帥諸侯之師伐鄭入其郛敗其徒
兵於洹上於是東諸侯之師次于鄆以待晉師晉師自
鄭以鄆之師侵楚焦夷及陳晉侯衛侯次于戚以爲之
援

秋楚公子壬夫帥師侵宋

秋楚子辛救鄭侵宋呂留鄭子然侵宋取犬丘

九月辛酉天王崩

邾子來朝冬衛侯使公孫剽來聘晉侯使荀偃來聘

九月邾子來朝禮也冬衛子叔晉知武子來聘禮也凡
諸侯卽位小國朝之大國聘焉以繼好結信謀事補闕
禮之大者也

二年

庚寅○周赧
卅九年

春王正月葬簡王

鄭師伐宋

二年春鄭師侵宋楚令也

○齊侯伐萊萊人使正與子賂夙沙衛以索馬牛皆百匹齊師乃還君子是以知齊靈公之爲靈也

夏五月庚寅夫人姜氏薨

夏齊姜薨初穆姜使擇美櫬以自爲櫬與頌琴季文子取以葬君子曰非禮也禮無所逆婦養姑者也虧姑以成婦逆莫大焉詩曰其惟哲人告之話言順德之行季孫於是爲不哲矣且姜氏君之妣也詩曰爲酒爲醴烝畀祖妣以洽百禮降福孔偕

六月庚辰

穀梁作庚寅

鄭伯踰卒

鄭成公疾子駟請息肩於晉公曰楚君以鄭故親集矢

於其目非異人任寡人也若背之是棄力與言其誰瞻
我免寡人唯二三子秋七月庚辰鄭伯踰卒

晉師宋師衛甯殖侵鄭

於是子罕當國子駟爲政子國爲司馬晉師侵鄭諸大
夫欲從晉子駟曰官命未改

秋七月仲孫蔑會晉荀偃宋華元衛孫林父曹人邾人于
戚

會于戚謀鄭故也孟獻子曰請城虎牢以偪鄭知武子
曰善鄫之會吾子聞崔子之言今不來矣滕薛小邾之
不至皆齊故也寡君之憂不唯鄭營將復於寡君而請
於齊得請而告吾子之功也若不得請事將在齊吾子
之請諸侯之福也豈唯寡君賴之

已丑葬我小君齊姜

齊侯使諸姜宗婦來送葬召萊子萊子不會故晏弱城

東陽以偪之

傳在鄭成公疾之前

叔孫豹如宋

穆叔聘于宋通嗣君也

冬仲孫蔑會晉荀瑩齊崔杼宋華元衛孫林父曹人邾人

滕人薛人小邾人于戚遂城虎牢

公羊曰虎牢者何鄭之邑也其言城之何取之

也取之則曷為不言取之為中國諱也曷為為中國諱其言遂何歸惡乎大夫也穀梁曰若言中國焉內鄭也

冬復會于戚齊崔武子及滕薛小邾之大夫皆會知武

子之言故也遂城虎牢鄭人乃成

楚殺其大夫公子申

楚公子申爲右司馬多受小國之賂以偪子重子辛楚人殺之故書曰楚殺其大夫公子申

三年

辛卯○鄭僖公薨頑元年

春楚公子嬰齊帥師伐吳

三年春楚子重伐吳爲簡之師克鳩茲至于衡山使鄧廖帥組甲三百被練三千以侵吳吳人要而擊之獲鄧廖其能免者組甲八十被練三百而已子重歸既飲至三日吳人伐楚取駕駕良邑也鄧廖亦楚之良也君子謂子重於是役也所獲不如所亡楚人以是咎子重子重病之遂遇心疾而卒

公如晉夏四月壬戌公及晉侯盟于長樛

公如晉始朝也夏盟于長樛孟獻子相公稽首知武子曰天子在而君辱稽首寡君懼矣孟獻子曰以敝邑介

在東表密邇仇讎寡君將君是望敢不稽首

公至自晉

○晉爲鄭服故且欲脩吳好將合諸侯使士匄告于齊曰寡君使匄以歲之不易不虞之不戒寡君願與一二兄弟相見以謀不協請君臨之使匄乞盟齊侯欲勿許而難爲不協乃盟於郕外○祁奚請老晉侯問嗣焉稱解狐其讎也將立之而卒又問焉對曰午也可於是羊舌職死矣晉侯曰孰可以代之對曰赤也可於是使祁午爲中軍尉羊舌赤佐之君子謂祁奚於是能舉善矣稱其讎不爲詔立其子不爲比舉其偏不爲黨商書曰無偏無黨王道蕩蕩其祁奚之謂矣解狐得舉祁午得位伯華赤得官建一官而三物成能舉善也夫唯善故能

舉其類詩云惟其有之是以似之祁奚有焉

六月公會單子晉侯宋公衛侯鄭伯莒子邾子齊世子光

己未同盟于雞澤穀梁曰同者有同也同外楚也

六月公會單頃公及諸侯己未同盟于雞澤晉侯使荀

會逆吳子于淮上吳子不至

陳侯使袁僑如會公羊曰其言如會何後會也穀梁曰如會外乎會也於會受命也

楚子辛為令尹侵欲於小國陳成公使袁僑如會求成

晉侯使和組父告于諸侯

戊寅叔孫豹及諸侯之大夫及陳袁僑盟公羊曰曷為殊及陳袁僑為其

與袁僑盟也穀梁曰大夫相與私盟是大夫張也故雞澤之會諸侯始失正矣曰袁僑異之也

秋叔孫豹及諸侯之大夫及陳袁僑盟陳請服也

秋公至自會

○晉侯之弟揚干亂行於曲梁魏絳戮其僕晉侯怒謂羊

舌赤曰合諸侯以爲榮也揚干爲戮何辱如之必殺魏絳無失也對曰絳無貳志事君不辟難有罪不逃刑其將來辭何辱命焉言終魏絳至授僕人書將伏劒士魴張老止之公讀其書曰日君乏使使臣斯司馬臣聞師衆以順爲武軍事有死無犯爲敬君合諸侯臣敢不敬君師不武執事不敬罪莫大焉臣懼其死以及揚干無所逃罪不能致訓至於用鉞臣之罪重敢有不從以怒君心請歸死於司寇公跣而出曰寡人之言親愛也吾子之討軍禮也寡人有弟弗能教訓使干大命寡人之過也子無重寡人之過敢以爲請晉侯以魏絳爲能以刑佐民矣反役與之禮食使佐新軍張老爲中軍司馬

士富爲候奄○楚司馬公子何忌侵陳陳叛故也
冬晉荀營帥師伐許

許靈公事楚不會于雞澤冬晉知武子帥師伐許

四年己酉春王三月己酉陳侯午卒

四年春楚師爲陳叛故猶在繁陽韓獻子患之言於朝
曰文王帥殷之叛國以事紂唯知時也今我易之難哉
三月陳成公卒楚人將伐陳聞喪乃止陳人不聽命臧
武仲聞之曰陳不服於楚必亡大國行禮焉而不服在
大猶有咎而況小乎夏楚彭名侵陳陳無禮故也

夏叔孫豹如晉

穆叔如晉報知武子之聘也晉侯享之金奏肆夏之三
不拜工歌文王之三又不拜歌鹿鳴之三三拜韓獻子

使行人子員問之曰子以君命辱於敝邑先君之禮藉之以樂以辱吾子吾子舍其大而重拜其細敢問何禮也對曰三夏天子所以享元侯也使臣弗敢與聞文王兩君相見之樂也臣不敢及鹿鳴君所以嘉寡君也敢不拜嘉四牡君所以勞使臣也敢不重拜皇皇者華君教使臣曰必諮於周臣聞之訪問於善爲咨咨親爲詢咨禮爲度咨事爲諏咨難爲謀臣獲五善敢不重拜

秋七月戊子夫人妣氏薨

公羊作弋氏

秋定妣薨不殯于廟無槨不虞匠慶謂季文子曰子爲正卿而小君之喪不成不終君也君長誰受其咎初季孫爲己樹六槨於蒲圃東門之外匠慶請木季孫曰略匠慶用蒲圃之槨季孫不御君子曰志所謂多行無禮

必自及也其是之謂乎

葬陳成公

八月辛亥葬我小君定姒

公羊作定弋

冬公如晉

冬公如晉聽政晉侯享公公請屬鄆晉侯不許孟獻子曰以寡君之密邇於仇讎而願固事君無失官命鄆無賦於司馬爲執事朝夕之命敝邑敝邑褊小闕而爲罪寡君是以願借助焉晉侯許之

陳人圍頓

楚人使頓閒陳而侵伐之故陳人圍頓

○無終子嘉父使孟樂如晉因魏莊子納虎豹之皮以請和諸戎晉侯曰戎狄無親而貪不如伐之魏絳曰諸侯

新殷陳新來和將觀於我我德則睦否則攜貳勞師於
戎而楚伐陳必弗能救是棄陳也諸華必叛戎禽獸也
然戎失華無乃不可乎夏訓有之曰有窮后羿公曰后
羿何如對曰昔有夏之方衰也后羿自鉏遷于窮石因
夏民以代夏政恃其射也不脩民事而淫于原獸棄武
維伯因熊髡龙圉而用寒浞寒浞伯明氏之讒子弟也
伯明后寒棄之夷羿收之信而使之以爲己相浞行嬖
于內而施賂于外愚弄其民而虞羿于田樹之詐慝以
取其國家外內咸服羿猶不悛將歸自田家奴殺而亨
之以食其子其子不忍食諸死于窮門靡奔有鬲氏浞
因羿室生澆及豷恃其讒慝詐僞而不德于民使澆用
師滅斟灌及斟尋氏處澆于過處豷于戈靡自有鬲氏

收二國之燼以滅浞而立少康少康滅澆于過后杼滅豷于戈有窮由是遂亡失人故也昔周辛甲之爲大史也命百官箴王闕於虞人之箴曰芒芒禹迹畫爲九州經啟九道民有寢廟獸有茂草各有攸處德用不擾在帝夷羿冒于原獸忘其國恤而思其麇牡武不可重用不恢于夏家獸臣司原敢告僕夫虞箴如是可不懲乎於是晉侯好田故魏絳及之公曰然則莫如和戎乎對曰和戎有五利焉戎狄荐居貴貨易土土可賈焉一也邊鄙不聳民狎其野穡人成功二也戎狄事晉四鄰振動諸侯威懷三也以德綏戎師徒不勤甲兵不頓四也鑒于后羿而用德度遠至邇安五也君其圖之公說使魏絳盟諸戎脩民事田以時○冬十月邾人莒人伐

郕滅紇救鄆侵邾敗於狐貍國人逆喪者皆髡魯於是乎始髡國人誦之曰滅之狐裘敗我於狐貍我君小子朱儒是使朱儒朱儒使我敗於邾

五年

癸巳○陳哀公溺元年

春公至自晉

五年春公至自晉

○王使王叔陳生愬戎于晉晉人執之士魴如京師言王叔之貳於戎也

夏鄭伯使公子發來聘

夏鄭子國來聘通嗣君也

叔孫豹鄆世子巫如晉

穆叔覲鄆大子于晉以成屬鄆書曰叔孫豹鄆大子巫如晉言比諸魯大夫也

仲孫蔑衛孫林父會吳于善道

公穀並作善稻

吳子使壽越如晉辭不會于雞澤之故且請諸侯之好
晉人將爲之合諸侯使魯衛先會吳且告會期故孟獻
子孫文子會吳于善道

秋大雩

秋大雩旱也

楚殺其大夫公子壬夫

楚人討陳叛故曰由令尹子辛實侵欲焉乃殺之書曰
楚殺其大夫公子壬夫貪也君子謂楚共王於是不刑
詩曰周道挺挺我心局局講事不令集人來定己則無
信而殺人以逞不亦難乎夏書曰成允成功

公會晉侯宋公陳侯衛侯鄭伯曹伯莒子邾子滕子薛伯

齊世子光與人郕人于戚

公羊曰吳何以稱人吳郕人云則不辭

九月丙午盟于戚會吳且命成陳也穆叔以屬郕為不

利使郕大夫聽命于會

公至白會

冬成陳

公羊曰孰成之諸侯成之曷為不言諸侯成之雖至不可得而序故言我也

楚公子貞帥師伐陳公會晉侯宋公衛侯鄭伯曹伯

公穀並有

莊子鄭子勝子薛伯齊世子光救陳

楚子囊為令尹范宣子曰我喪陳矣楚人討貳而立子

囊必改行而疾討陳陳近於楚民朝夕急能無往乎有

陳非吾事也無之而後可冬諸侯成陳子囊伐陳十一

月甲午會于城棣以救之

十有二月公至自救陳

春秋左傳卷十一
九
辛未季孫行父卒

季文子卒大夫入斂公在位宰庀家器爲葬備無衣帛之妾無食粟之馬無藏金玉無重器備君子是以知季文子之忠於公室也相三公矣而無私積可不謂忠乎

六年

甲午

春王三月壬午杞伯姑容卒

六年春杞桓公卒始赴以名同盟故也

夏宋華弼來奔

宋華弼與樂轡少相狎長相優又相謗也子蕩

樂轡怒以

以杞華弼于朝平公見之曰司武而楷於朝難以勝矣

遂逐之夏宋華弼來奔司城子罕曰同罪異罰非刑也

專戮於朝罪孰大焉亦逐子蕩子蕩射子罕之門曰幾

日而不我從子罕善之如初

秋葬杞桓公

滕子來朝

秋滕成公來朝始朝公也

莒人滅鄆

穀梁曰非滅也中國日卑國月夷狄時鄆中國也而時非滅也立異姓以蒞祭祀滅亡之道也

公羊曰莒女有爲鄆夫人者莒欲立其出也

莒人滅鄆鄆恃賂也

冬叔孫豹如邾

冬穆叔如邾聘且脩平

季孫宿如晉

晉人以鄆故來討曰何故亡鄆季武子如晉見且聽命

十有二月齊侯滅萊

公羊曰曷爲不言萊公出奔國滅君死之正也

十一月齊侯滅萊萊恃謀也於鄭子國之來聘也四月

晏弱城東陽而遂圍萊甲寅堙之環城傅於堞及杞桓公卒之月乙未王湫帥師及正與子棠人軍齊師齊師大敗之丁未入萊萊共公浮柔奔棠正與子王湫奔莒莒人殺之四月陳無宇獻萊宗器于襄宮晏弱圍棠十一月丙辰而滅之遷萊于郕高厚崔杼定其田

七年

乙未○杞考公句元年

春鄆子來朝

七年春鄆子來朝始朝公也

夏四月三卜郊不從乃免牲

穀梁曰夏四月不時也三卜禮也乃者亡乎人之辭也

夏四月三卜郊不從乃免牲孟獻子曰吾乃今而後知有卜筮夫郊祀后稷以祈農事也是故啟蟄而郊郊而後耕今既耕而卜郊宜其不從也

小鄆子來朝

魯在城費之後

小邾穆公來朝亦始朝公也

城費

南遺爲費宰叔仲昭伯爲隧正欲善季氏而求媚於南
遺謂遺請城費吾多與而役故季氏城費

秋平孫宿如衛

秋季武子如衛報子叔之聘且辭緩報非貳也

八月螽

○冬十月晉韓獻子告老公族穆子有廢疾將立之辭曰
詩曰豈不夙夜謂行多露又曰弗躬弗親庶民弗信無
忘不才讓其可乎請立起宣也與田蘇游而曰好仁詩
曰靖共爾位好是正直神之聽之介爾景福恤民爲德
正直爲正正曲爲直參和爲仁如是則神聽之介福降

之立之不亦可乎庚戌使宣子朝遂老晉侯謂韓無忌
仁使掌公族大夫

冬十月衛侯使孫林父來聘壬戌及孫林父盟

衛孫文子來聘且拜武子之言而尋孫桓子之盟公登
亦登叔孫穆子相趨進曰諸侯之會寡君未嘗後衛君
今吾子不後寡君寡君未知所過吾子其少安孫子無
辭亦無悛容穆叔曰孫子必亡爲臣而君過而不悛亡
之本也詩曰退食自公委蛇委蛇謂從者也衡而委蛇
必折

楚公子貞帥師圍陳十有二月公會晉侯宋公陳侯衛侯
曹伯莒子邾子于鄆

楚子囊圍陳會于鄆以救之

鄭伯髡頑如會

公羊作髡原

未見諸侯丙戌卒于剕

公穀並作剕

日據者何鄭之邑也諸侯卒其封內不地此何以地隱也何隱爾弑也孰弑之其大夫弑之曷為不言其大夫弑之為中國諱也曷為為中國諱鄭伯將會諸侯于郕其大夫諫曰中國不足歸也則不若與楚鄭伯曰不可其大夫曰以中國為義則伐我喪以中國為強則不若楚於是弑之鄭伯髡頑何以致其名傷而反未至乎舍而卒也未見諸侯其言如會何致其意也穀梁曰其不言弑何也不使夷狄之民加乎中國之君也其地於外也其日未踰竟也日卒時葬正也

鄭僖公之為太子也於成之十六年與子罕適晉不禮焉又與子豐適楚亦不禮焉及其元年朝于晉子豐欲愬諸晉而廢之子罕止之及將會于鄆子駟相又不禮焉侍者諫不聽又諫殺之及鄆子駟使賊夜弑僖公而以瘡疾赴于諸侯簡公生五年奉而立之

陳侯逃歸

陳人患楚慶虎慶寅謂楚人曰吾使公子黃往而執之
楚人從之二慶使告陳侯于會曰楚人執公子黃矣君
若不來羣臣不忍社稷宗廟懼有二圖陳侯逃歸

八年

丙申○鄭簡公嘉元年

春王正月公如晉

八年春公如晉朝且聽朝聘之數

夏葬鄭僖公

公羊曰賊未討何以書葬為中國諱也

○鄭羣公子以僖公之死也謀子駟子駟先之夏四月庚

辰辟殺子狐子熙子侯子丁孫擊孫惡出奔衛

鄭人侵蔡獲蔡公子燮

燮穀梁作淫○傳曰人微者也侵淺事也而獲公子公子病矣

庚寅鄭子國子耳侵蔡獲蔡司馬公子燮鄭人皆喜唯
子產不順曰小國無文德而有武功禍莫大焉楚人來
討能勿從乎從之晉師必至晉楚伐鄭自今鄭國不四

五年弗得寧矣子國怒之曰爾何知國有大命而有正卿童子言焉將為戮矣

季孫宿會晉侯鄭伯齊人宋人衛人邾人于邢王

穀梁曰見晉之

大正也公存而大夫會也

五月甲辰會于邢王以命朝聘之數使諸侯之大夫聽

命季孫宿齊高厚宋向戌衛甯殖邾大夫會之鄭伯獻

捷于會故親聽命大夫不書尊晉侯也

襄二十二年傳子產對晉徵朝

曰在晉悼公九年我寡君於是即位即位八月而我先大夫子驪從寡君以朝于執事執事不禮于寡君寡君懼因是行也

公至自晉

晉人伐我東鄙

晉人伐我東鄙以疆鄆田

秋九月大雩

秋九月大雩旱也

冬楚公子貞帥師伐鄭

冬楚子囊伐鄭討其侵蔡也子駟子國子耳欲從楚子孔子矯子展欲待晉子駟曰周詩有之曰俟河之清人壽幾何兆云詢多職競作羅謀之多族民之多違事滋無成民急矣姑從楚以紓吾民晉師至吾又從之敬共幣帛以待來者小國之道也犧牲玉帛待於二竟以待彊者而庇民焉寇不爲害民不罷病不亦可乎子展曰小所以事大信也小國無信兵亂日至亡無日矣五會之信今將背之雖楚救我將安用之親我無成鄙我是欲不可從也不如待晉晉君方明四軍無闕八卿和睦

必不棄鄭楚師遼遠糧食將盡必將速歸何患焉舍之聞之杖莫如信完守以老楚杖信以待晉不亦可乎子駟曰詩云謀夫孔多是用不集發言盈庭誰敢執其咎如匪行邁謀是用不得于道請從楚驂也受其咎乃及楚平使王子伯駟告于晉曰君命敝邑脩而車賦敝而師徒以討亂略蔡人不從敝邑之人不敢寧處悉索敝賦以討于蔡獲司馬燮獻于邢丘今楚來討曰女何故稱兵于蔡焚我郊保馮陵我城郭敝邑之衆夫婦男女不遑啟處以相救也翦焉傾覆無所控告民死亡者非其父兄卽其子弟夫人愁痛不知所庇民知窮困而受盟于楚孤也與其二三臣不能禁止不敢不告知武子使行人子員對之曰君有楚命亦不使一介行李告于

寡君而即安于楚君之所欲也誰敢違君寡君將帥諸侯以見于城下唯君圖之

晉侯使士匄來聘

晉范宣子來聘且拜君之辱告將用師于鄭公享之宣子賦標有梅季武子曰誰敢哉今譬於草木寡君在君君之臭味也歡以承命何時之有武子賦角弓賓將出武子賦彤弓宣子曰城濮之役我先君文公獻功于衡雍受彤弓于襄王以爲子孫藏匄也先君守官之嗣也敢不承命君子以爲知禮

九年春宋災

公羊作火○傳曰大者曰災小者曰火外災不書此何以書爲王者之後記災也

九年春宋災樂喜爲司城以爲政使伯氏司里火所未至徹小屋塗大屋陳畚揭具綆缶備水器量輕重蓄水

潦積土塗巡丈城繕守備表水道使華臣具正徒令隧
正納郊保奔火所使華閭討右官官庀其司向戍討左
亦如之使樂過治刑器亦如之使皇鄭命校正出馬工
正出車備軍兵庀武守使西鉏吾庀府守令司宮巷伯
儆宮二師令四鄉正敬享祝宗用馬于四墉祀盤庚于
西門之外晉侯問於士弱曰吾聞之宋災於是乎知有
天道何故對曰古之火正或食於心或食於昧以出內
火是故昧爲鶉火心爲大火陶唐氏之火正閼伯居商
丘祀大火而火紀時焉相土因之故商主大火商人閼
其禍敗之釁必始於火是以日知其有天道也公曰可
必乎對曰在道國亂無象不可知也

夏季孫宿如晉

夏季武子如晉報宣子之聘也

五月辛酉夫人姜氏薨

穆姜薨於東宮始往而筮之遇艮之八三三史曰是謂艮之隨三三隨其出也君必速出姜曰亡是於周易曰隨元亨利貞無咎元體之長也亨嘉之會也利義之和也貞事之幹也體仁足以長人嘉德足以合禮利物足以和義貞固足以幹事然故不可誣也是以雖隨無咎今我婦人而與於亂固在下位而有不仁不可謂元不靖國家不可謂亨作而害身不可謂利棄位而姦不可謂貞有四德者隨而無咎我皆無之豈隨也哉我則取惡能無咎乎必死於此弗得出矣

○秦景公使士旌乞師于楚將以伐晉楚子許之子囊曰

不可當今吾不能與晉爭晉君類能而使之舉不失選
官不易方其卿讓於善其大夫不失守其士競於教其
庶人力於農穡商工阜隸不知遷業韓厥老矣知營稟
焉以爲政范匄少於中行偃而上之使佐中軍韓起少
於欒黶而欒黶士魴上之使佐上軍魏絳多功以趙武
爲賢而爲之佐君明臣忠上讓下競當是時也晉不可
敵事之而後可君其圖之王曰吾既許之矣雖不及晉
必將出師秋楚子師于武城以爲秦援秦人侵晉晉饑
弗能報也

附錄

襄二十二年傳子產對晉徵朝曰我二年六月朝於楚晉是以有戲之役

秋八月癸未葬我小君穆姜

冬公會晉侯宋公衛侯曹伯莒子邾子滕子薛伯杞伯

穀梁

伯無杞

小邾子齊世子光伐鄭十有二月己亥同盟于戲梁

日不異言鄭善得鄭也
不致貶不能據鄭也

冬十月諸侯伐鄭庚午季武子齊崔杼宋皇鄭從荀偃
士匄門于鄆門衛北宮括曹人邾人從荀偃韓起門于
師之梁滕人薛人從欒黶士魴門于北門杞人鄭人從
趙武魏絳斬行栗甲戌師于汜令於諸侯曰脩器備盛
餼糧歸老幼居疾于虎牢肆筵設幄鄭人恐乃行成中
行獻子荀偃曰遂圍之以待楚人之救也而與之戰不然
無成知武子曰許之盟而還師以敝楚人吾三分四軍
與諸侯之銳以逆來者於我未病楚不能矣猶愈於戰
暴骨以逞不可以爭大勞未艾君子勞心小人勞力先
王之制也諸侯皆不欲戰乃許鄭成十一月己亥同盟

于戲鄭服也將盟鄭六卿公子駢子駢公子發子發公子嘉

公孫輒子輒公孫莖子莖公孫舍之子舍之及其大夫門子皆

從鄭伯晉士莊子爲載書曰自今日既盟之後鄭國而

不唯晉命是聽而或有異志者有如此盟公子駢趨進

曰天禍鄭國使介居二大國之間大國不加德音而亂

以要之使其鬼神不獲歆其禮祀其民人不獲享其土

利夫婦辛苦墊隘無所底告自今日既盟之後鄭國而

不唯有禮與彊可以庇民者是從而敢有異志者亦如

之苟偃曰改載書公孫舍之曰昭大神要言焉若可改

也大國亦可叛也知武子謂獻子曰我實不德而要人

以盟豈禮也哉非禮何以主盟姑盟而退脩德息師而

來終必獲鄭何必今日我之不德民將棄我豈唯鄭若

能休和遠人將至何恃於鄭乃盟而還晉人不得志於鄭以諸侯復伐之十二月癸亥門其三門閏月戊寅濟于陰阪侵鄭次于陰口而還子孔曰晉師可擊也師老而勞且有歸志必大克之子展曰不可

○公送晉侯晉侯以公宴于河上問公年季武子對曰會于沙隨之歲寡君以生晉侯曰十二年矣是爲一終一星終也國君十五而生子冠而生子禮也君可以冠矣大夫曷爲冠具武子對曰君冠必以裸享之禮行之以金石之樂節之以先君之祧處之今寡君在行未可具也請及兄弟之國而假備焉晉侯曰諾公還及衛冠于成公之廟假鐘磬焉禮也

楚子伐鄭

楚子伐鄭子駟將及楚平子孔子矯曰與大國盟口血未乾而背之可乎子駟子展曰吾盟固云唯彊是從今楚師至晉不我救則楚彊矣盟誓之言豈敢背之且要盟無質神弗臨也所臨唯信信者言之瑞也善之主也是故臨之明神不蠲要盟背之可也乃及楚平公子罷戎入盟同盟于中分楚莊夫人卒王未能定鄭而歸

○晉侯歸謀所以息民魏絳請施舍輸積聚以貸自公以下苟有積者盡出之國無滯積亦無困人公無禁利亦無貪民所以幣更賓以特牲器用不作車服從給行之期年國乃有節三駕而楚不能與爭

十年戊戌春公會晉侯宋公衛侯曹伯莒子邾子滕子薛伯杞伯小邾子齊世子光會吳于柵穀梁曰會又會外之也

十年春會于柤會吳子壽夢也三月癸丑齊高厚相大子光以先會諸侯于鍾離不敬士莊子曰高子相大子以會諸侯將社稷是衛而皆不敬棄社稷也其將不免乎夏四月戊午會于柤

夏五月甲午遂滅偃陽

穀梁作傳陽○傳曰其曰遂何不以中國從夷狄也

晉荀偃士句請伐偃陽而封宋向戌焉荀偃曰城小而固勝之不武弗勝爲笑固請丙寅圍之弗克孟氏之臣秦堇父輦重如役偃陽人啟門諸侯之士門焉縣門發聊人紇抉之以出門者狄虎彌建大車之輪而蒙之以甲以爲櫓左執之右拔戟以成一隊孟獻子曰詩所謂有力如虎者也主人縣布堇父登之及堞而絕之隊則又縣之蘇而復上者三主人辭焉乃退帶其斷以徇於

軍三日諸侯之師久於偃陽荀偃士句請於荀瑩曰水潦將降懼不能歸請班師知伯怒投之以机出於其閒曰女成二事而後告余余恐亂命以不女違女既勤君而興諸侯率師老夫以至于此既無武守而又欲易余罪曰是實班師不然克矣余羸老也可重任乎七日不克必爾乎取之五月庚寅荀偃士句帥卒攻偃陽親受矢石甲午滅之書曰遂滅偃陽言自會也以與向戌向戌辭曰君若猶辱鎮撫宋國而以偃陽光啟寡君羣臣安矣其何貺如之若專賜臣是臣興諸侯以自封也其何罪大焉敢以死請乃予宋公宋公享晉侯於楚丘請以桑林荀瑩辭荀偃士句曰諸侯宋魯於是觀禮魯有禘樂賓祭用之宋以桑林享君不亦可乎舞師題以旌

夏晉侯懼而退入于房去旌卒享而還及著雍疾卜桑
林見荀偃士句欲奔請禱焉荀營不可曰我辭禮矣彼
則以之猶有鬼神於彼加之晉侯有閒以偃陽子歸獻
于武宮謂之夷俘偃陽妘姓也使周內史選其族嗣納
諸霍人禮也師歸孟獻子以秦堇父爲右生秦丕茲事
仲尼

公至自會

穀梁曰會夷狄不致惡事不
致此其致何也存中國也

楚公子貞鄭公孫輒帥師伐宋

六月楚子囊鄭子耳伐宋師于訾母庚午圍宋門于桐
門

晉師伐秦

晉荀營伐秦報其侵也

○衛侯救宋師于襄牛鄭子展曰必伐衛不然是不與楚也得罪於晉又得罪於楚國將若之何子駟曰國病矣子展曰得罪於二大國必亡病不猶愈於亡乎諸大夫皆以爲然故鄭皇耳帥師侵衛楚令也孫文子卜追之獻兆於定姜姜氏問繇曰兆如山陵有夫出征而喪其雄姜氏曰征者喪雄禦寇之利也大夫圖之衛人迫之孫蒯獲鄭皇耳于犬丘○秋七月楚子囊鄭子耳侵我西鄙還圍蕭八月丙寅克之九月子耳侵宋北鄙孟獻子曰鄭其有災乎師競已甚周猶不堪競況鄭乎有災其執政之三士乎

秋莒人伐我東鄙

莒人聞諸侯之有事也故伐我東鄙

公會晉侯宋公衛侯曹伯莒子邾子齊世子光滕子薛伯
杞伯小邾子伐鄭

諸侯伐鄭齊崔杼使大子光先至于師故長於滕己酉
師于牛首

冬盜殺鄭公子騂

公穀並作斐

公子發公孫輒

初子駟與尉止有爭將禦諸侯之師而黜其車尉止獲
又與之爭子駟抑尉止曰爾車非禮也遂弗使獻初子
駟爲田洫司氏堵氏侯氏子師氏皆喪田焉故五族聚
羣不逞之人因公子之徒以作亂於是子駟當國子國
爲司馬子耳爲司空子孔爲司徒冬十月戊辰尉止司
臣侯晉堵女父子師僕帥賊以入晨攻執政于西宮之
朝殺子駟子國子耳劫鄭伯以如北宮子孔知之故不

死書曰盜言無大夫焉子西

子驪

聞盜不傲而出口而

追盜盜入於北宮乃歸授甲臣妾多逃器用多喪子產

子國

聞盜爲門者庀羣司閉府庫慎閉藏完守備成列

而後出兵車十七乘尸而攻盜於北宮子驪帥國人助

之殺尉止子帥僕盜衆盡死侯晉奔晉堵女父司臣尉

翩司齊奔宋子孔當國爲載書以位序聽政辟大夫諸

司門子弗順將誅之子產止之請爲之焚書子孔不可

曰爲書以定國衆怒而焚之是衆爲政也國不亦難乎

子產曰衆怒難犯專欲難成合二難以安國危之道也

不如焚書以安衆子得所欲衆亦得安不亦可乎專欲

無成犯衆興禍子必從之乃焚書於倉門之外衆而後

定

成鄭虎牢

公羊曰孰成之諸侯成之曷為不言諸侯成之離至不可得而序故言我也諸侯已取之矣曷

為繫之鄭諸侯莫之主有故反繫之鄭

楚公子貞帥師救鄭

諸侯之師城虎牢而成之晉師城梧及制士魴魏絳成之書曰成鄭虎牢非鄭地也言將歸焉鄭及晉平楚子囊救鄭十一月諸侯之師還鄭而南至於陽陵楚師不退知武子欲退曰今我逃楚楚必驕驕則可與戰矣欒黶曰逃楚晉之恥也合諸侯以益恥不如死我將獨進師遂進己亥與楚師夾潁而軍子蟜曰諸侯既有成行必不戰矣從之將退不從亦退退楚必圍我猶將退也不如從楚亦以退之皆涉潁與楚人盟欒黶欲伐鄭師荀罃不可曰我實不能禦楚又不能庇鄭鄭何罪不如致怨焉而還今伐其師楚必救之戰而不克為諸侯笑

克不可命不如還也丁未諸侯之師還侵鄭北鄙而歸
楚人亦還

公至自伐鄭

○王叔陳生與伯輿爭政王右伯輿王叔陳生怒而出奔
及河王復之殺史狡以說焉不入遂處之晉侯使士匄
平王室王叔與伯輿訟焉王叔之宰與伯輿之大夫瑕
禽坐獄於王庭士匄聽之王叔之宰曰簞門閭竇之人
而皆陵其上其難爲上矣瑕禽曰昔平王東遷吾七姓
從王牲用備具王賴之而賜之駢旄之盟曰世世無失
職若簞門閭竇其能來東底乎且王何賴焉今自王叔
之相也政以賄成而刑放於寵官之師旅不勝其富吾
能無簞門閭竇乎唯大國圖之下而無直則何謂正矣

范宣子曰天子所右寡君亦右之所左亦左之使王叔氏與伯輿合要王叔氏不能舉其契王叔奔晉不書不告也單靖公爲卿士以相王室

十有一年

己亥

春王正月作三軍

公羊曰三軍者何三卿也作三軍何以書譏何譏爾

古者上卿下卿上士下士

十一年春季武子將作三軍告叔孫穆子曰請爲三軍

各征其軍穆子曰政將及子子必不能

國語曰季武子爲三軍叔孫穆

子曰不可天子作師公帥之以征不德元侯作師卿帥之以承天子諸侯有卿無軍帥教衛以贊元侯自伯子男有大夫無卿帥賦以從諸侯是以上能征下下無姦慝今我小侯也處大國之間繕貢賦以供從者猶懼有討若爲元侯之所以怒武子固請之穆子曰然則盟諸大國無乃不可乎弗從乃盟諸偃闔詛諸五父之衢正月作三軍三分公室而各有其一三子各毀其乘季氏使其乘之人以其役邑

入者無征不入者倍征孟氏使半爲臣若子若弟叔孫氏使盡爲臣不然不舍

附錄

襄二十一年傅子產對晉徵朝曰我四年三月先大夫子蟠又從寡君以觀鸞于楚晉於是乎有蕭

役魚之

夏四月四卜郊不從乃不郊

穀梁曰夏四月不時也四卜非禮也

鄭公孫舍之帥師侵宋

鄭人患晉楚之故諸大夫曰不從晉國幾亡楚弱於晉晉不吾疾也晉疾楚將悻之何爲而使晉師致死於我楚弗敢敵而後可固與也子展曰與宋爲惡諸侯必至吾從之盟楚師至吾又從之則晉怒甚矣晉能驟來楚將不能吾乃固與晉大夫說之使疆場之司惡於宋宋向戌侵鄭大獲子展曰師而伐宋可矣若我伐宋諸侯

之伐我必疾吾乃聽命焉且告於楚楚師至吾又與之盟而重賂晉師乃免矣夏鄭子展侵宋

公會晉侯宋公衛侯曹伯齊世子光莒子邾子勝子薛伯杞伯小邾子伐鄭

四月諸侯伐鄭己亥齊大子光宋向戌先至于鄭門于東門其莫晉荀偃至于西郊東侵舊許衛孫林父侵其北鄙六月諸侯會于北林師于向右還次于瑣圍鄭觀兵于南門西濟于濟隧

秋七月己未同盟于亳城北

亳公穀並作京

鄭人懼乃行成秋七月同盟于亳范宣子曰不慎必失諸侯諸侯道敝而無成能無貳乎乃盟載書曰凡我同盟毋蒞年毋壅利毋保姦毋畱慝救災恤禍亂同好

惡獎王室或開茲命司慎司盟名山名川羣神羣祀先王先公七姓十二國之祖明神殛之俾失其民隊命亡氏陪其國家

公至自伐鄭

穀梁曰不以後致盟後復伐鄭也

楚子鄭伯伐宋

楚子囊乞旅于秦秦右大夫詹帥師從楚子將以伐鄭鄭伯逆之丙子伐宋

公會晉侯宋公衛侯曹伯齊世子光莒子邾子滕子薛伯

杞伯小邾子伐鄭會于蕭魚

公羊曰此伐鄭也其言會于蕭魚何蓋鄭與會爾

九月諸侯悉師以復伐鄭諸侯之師觀兵于鄭東門鄭人使王子伯駢行成甲戌晉趙武入盟鄭伯冬十月丁亥鄭子展出盟晉侯十二月戊寅會于蕭魚庚辰赦鄭

囚皆禮而歸之納斥候禁侵掠晉侯使叔肸告于諸侯
公使臧孫紇對曰凡我同盟小國有罪大國致討苟有
以藉手鮮不赦宥寡君聞命矣鄭人賂晉侯以師攄師
觸師蠲廣車輶車淳十五乘甲兵備凡兵車百乘歌鍾
二肆及其鏜磬女樂二八晉侯以樂之半賜魏絳曰子
教寡人和諸戎狄以正諸華八年之中九合諸侯如樂
之和無所不諧請與子樂之辭曰夫和戎狄國之福也
八年之中九合諸侯諸侯無慝君之靈也二三子之勞
也臣何力之有焉抑臣願君安其樂而思其終也詩曰
樂旨君子殿天子之邦樂旨君子福祿攸同便蕃左右
亦是帥從夫樂以安德義以處之禮以行之信以守之
仁以厲之而後可以殿邦國同福祿來遠人所謂樂也

書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之魏絳於是乎始有金石之樂禮也

公至自會

穀梁曰伐而後會不以伐鄭致得鄭伯之辭也

楚人執鄭行人良霄

鄭人使良霄大宰石爰如楚告將服于晉曰孤以社稷之故不能懷君君若能以玉帛綏晉不然則武震以攝威之孤之願也楚人執之書曰行人言使人也

傳在諸侯悉師

以復伐鄭之後

冬秦人伐晉

秦庶長鮑庶長武帥師伐晉以救鄭鮑先入晉地士魴

御之少秦師而弗設備壬午武濟自輔氏與鮑交代晉
師己丑秦晉戰于櫟晉師敗績易秦故也

春秋經傳比事卷十一終